



Republika e Kosovës

Republika Kosova - Republic of Kosovo

Agjencia e Kosovës për Akreditim
Agencija Kosova za Akreditaciju
Kosovo Accreditation Agency



Përmbledhje e aktiviteteve kryesore të Agjencisë së Kosovës për Akreditim (AKA) gjatë vitit 2021

PËRMBAJTJA

1. ZHVILLIMET KRYESORE NË AGJENCINË E AKREDITIMIT PËR VITIN 2021.....	2
1.1 AKA ka përfunduar me sukses proceset e akreditimit për 239 programe studimore.....	2
1.2 Gjatë vitit 2021 në procesin e akreditimit janë angazhuar 81 ekspertë ndërkombëtarë.....	3
1.3 Aprovimi i Planit Strategjik të AKA-së 2021-2025.....	3
1.4 Binjakëzimi ndërmjet Agjencive të Akreditimit të Kosovës dhe Austrisë.....	3
1.5 Është finalizuar studimi i fizibilitetit për digjitalizimin dhe automatizimin e proceseve në AKA.....	4
1.6 Është aprovuar metodologjia për analiza tematike.....	4
1.7 Është aprovuar Udhëzuesi për Vlerësim të Brendshëm të stafit të AKA.....	5
1.8 Është finalizuar Metodologjia e Monitorimit dhe procedurave pasakredituese.....	5
1.9 Vërtetimet për akreditim tani lëshohen online.....	5
1.10 Është aprovuar Manuali për ekspertë ndërkombëtarë të akreditimit.....	6
1.11 Është lansuar ueb faqja e re e AKA-së dhe profili zyrtar në Facebook.....	6
1.12. ASHI garanton sigurinë kibernetike të AKA-së.....	6
1.13 Ndërlidhja e Platformës E-Akreditimi me Administratën Tatimore.....	6
1.14 Publikohen të gjitha vendimet dhe raportet e ekspertëve ndërkombëtarë të akreditimit ...	7
1.15 AKA publikon listat me programet e akredituara dhe spotin informues.....	7
2. PLOTËSIMI I REKOMANDIMEVE PËR ENQA DHE EQAR.....	7
2.1 Miratimi i Ligjit për AKA-në në Qeveri.....	7
2.2 Plani Dinamik për kthim në ENQA dhe EQAR.....	8

2.3 Vizitat e KShC dhe AKA në të gjitha institucionet e arsimit të lartë.....	8
2.4 Ndërtesa e re e AKA-së.....	8
2.5 Rekrutimi i stafit	8
2.6 Bashkëpunimi me shoqërinë civile	8
2.7 Avokatura Shtetërore: AKA nuk rrezikohet nga asnjë kontest gjyqësor.....	8
3. BASHKËPUNIMI ME INSTITUCIONE E PARTNERË NDËRKOMBËTARË.....	9
3.1 Raporti i Komisionit Evropian për Kosovën, shumë pozitiv për punën e AKA-së.....	9
3.2 Rishikimi i standardeve në nivelin bachelor dhe master.....	9
3.3 AKA fiton grant nga Ambasada Amerikane për përfshirjen e studentëve në vendimmarrje	10
3.4 CEENQA prezanton suksesin e AKA-së në procesin e digjitalizimit të shërbimeve	10
3.5 AKA dhe Asociacioni amerikan ATMAE bashkëpunojnë për nxitjen e cilësisë në arsimin e lartë.....	10

1. ZHVILLIMET KRYESORE NË AGJENCINË E AKREDITIMIT PËR VITIN 2021

1.1 AKA ka përfunduar me sukses proceset e akreditimit për 239 programe studimore

Agjencia e Kosovës për Akreditim (AKA), gjatë këtij vitit 2021 ka arritur të përfundojë me sukses procesin e akreditimit për 239 programe akademike dhe 9 procese të akreditimit në nivel të institucioneve të arsimit të lartë. Prej këtij numri 199 raporte/vendime janë pozitive për akreditim, ndërsa 40 janë rekomanduar që të mos akreditohen.

Përkundër shumë vështirësive që ka paraqitur pandemia COVID-19, ekipi i AKA-së arriti të kryejë të gjitha vizitat në terren brenda afatit ligjor, dhe i ka mundësuar Këshillit Shtetëror të Cilësisë (KShC) që të marrë vendimet për akreditim (ose refuzim) me kohë.

Vizitat në terren janë zhvilluar nga ekspertët ndërkombëtarë në distancë (online) por ekipi i AKA-së së bashku me drejtorin kanë qenë prezentë fizikisht në çdo proces të vlerësimit të jashtëm dhe kanë bërë verifikimin e të gjithë personave që kanë qenë të përfshirë në akreditim, mandej janë verifikuar fizikisht të gjitha informatat, dokumentet dhe videot të cilat u janë prezantuar ekspertëve ndërkombëtarë.

Ekspertët ndërkombëtarë të angazhuar në procesin e vlerësimit kanë konfirmuar se gjatë vitit 2021 kanë parë zhvillime shumë pozitive në cilësinë e arsimit të lartë në Kosovë.

Gjatë procesit të akreditimit AKA nuk ka pranuar asnjë ankesë nga asnjë institucion i arsimit të lartë, lidhur me procesin e vlerësimit të jashtëm. Ankesat si rëndom kanë ardhur pasi që janë dorëzuar draftet e raporteve të ekspertëve ndërkombëtarë, që në disa raste kanë qenë negative për akreditim të programeve të studimit. Procesi i akreditimit në Kosovë është vlerësuar pozitivisht në raportin e Komisionit Evropian për Kosovën, është vlerësuar pozitivisht gjatë takimeve me drejtoreshën e Asociacionit Evropian të Sigurimit të Cilësisë

në Arsimin e Lartë (ENQA) dhe nga Rrjeti i Agjencive të Sigurimit të Cilësisë në Arsimin e Lartë të Evropës Qendrore dhe Lindore (CEENQA). Procesi i akreditimit në Kosovë është vlerësuar pozitivisht edhe nga monitoruesit vendorë dhe nga donatorët ndërkombëtarë.

1.2 Gjatë vitit 2021 në procesin e akreditimit janë angazhuar 81 ekspertë ndërkombëtarë

Konform legjislacionit në fuqi, Kosova është i vetmi vend në rajon që i gjithë procesi i vlerësimit të jashtëm të institucioneve të arsimit të lartë dhe programeve të tyre të studimit zbatohet nga ekspertët ndërkombëtarë. Procesi i akreditimit gjatë vitit 2021 përfshiu 81 ekspertë eminentë evropianë në fushat përkatëse të studimit.

Gjatë këtij procesi AKA ka zbatuar rekomandimin e ENQA, për përfshirjen e studentëve ekspertë në proces të akreditimit.

Të gjitha draftet e raporteve të ekspertëve ndërkombëtarë, u janë dërguar institucioneve të arsimit të lartë për koment, para se të dërgohen në KShC për shqyrtim dhe proces të vendimmarrjes.

1.3 Aprovimi i Planit Strategjik të AKA-së 2021-2025

Këshilli Shtetëror i Cilësisë në mbledhjen e mbajtur më 18 dhjetor 2021 ka aprovuar Planin Strategjik të AKA-së 2021-2025.

Plani Strategjik pesëvjeçar i AKA-së ka këto objektiva:

- a) Rikthimi i anëtarësisë së AKA-së në Asociacionin Evropian të Sigurimit të Cilësisë në Arsimin e Lartë (ENQA) dhe Regjistrin Evropian për Sigurimin e Cilësisë në Arsimin e Lartë (EQAR);
- b) Kornizë e konsoliduar ligjore që garanton pavarësi institucionale dhe financiare të AKA-së në kryerjen e proceseve të sigurimit të jashtëm të cilësisë;
- c) Sistem i avancuar i menaxhimit dhe administrimit të AKA-së përmes rritjes së kapaciteteve fizike dhe profesionale;
- d) Përmirësimi i cilësisë në sektorin e arsimit të lartë përmes procedurave efikase dhe efektive të akreditimit dhe monitorimit;
- e) Digjitalizimi i avancuar i procedurave të AKA-së për një menaxhim efektiv të informatave dhe të dhënave të procedurave të vlerësimit të jashtëm.

Plani Strategjik i AKA-së është hartuar fillimisht nga stafi i Agjencisë, mandej janë angazhuar 4 ekspertë vendorë dhe në fund, me përkrahjen e Projektit Heras Plus, është angazhuar një ekspert gjerman për të verifikuar nëse plani strategjik është në pajtim me standardet evropiane dhe rekomandimet e ENQA.

Në përpilimin e Planit Strategjik ka pas një gjithëpërfshirje të të gjithë akterëve të arsimit të lartë.

[Shkarko dokumentin në ueb faqen e AKA-së](#)

1.4 Binjakëzimi ndërmjet Agjencive të Akreditimit të Kosovës dhe Austrisë

Me përkrahjen e projektit Heras Plus, i financuar nga Agjencia për Zhvillim Ndërkombëtar (ADA) e Austrisë, Agjencia e Kosovës për Akreditim është binjakëzuar me Agjencinë e homologe Austriake për Sigurimin e Cilësisë dhe Akreditimin.

Ky projekt rrit bashkëpunimin në fushën e arsimit ndërmjet Kosovës dhe Austrisë.

Përfituesit kryesor i këtij projekti do të jenë AKA dhe të gjitha palët në arsimin e lartë në Kosovë, duke përfshirë universitetet publike dhe kolegjet private, të cilat kanë mijëra studentë dhe staf mësimdhënës. Përmirësimi i politikave dhe rritja e kapaciteteve të AKA-së ndikon drejtpërdrejt në cilësinë e arsimit të lartë në Kosovë. Përmes implementimit të Standardeve dhe Udhëzimeve Evropiane (ESG) nga Kosova, shkëmbimi i studentëve dhe stafit akademik bëhet shumë më i lehtë. Me zbatimin e standardeve ESG,

krijohen hapësira për të lehtësuar integrimin e sistemit arsimor të Kosovës në BE, si dhe krijohen subjekte për njohjen e diplomave të studentëve kosovarë në vendet e BE-së.

Projekti i binjakëzimit synon shkëmbimin e përvojave austriake për AKA-në, përmes vizitave të ndërsjella, konferencave, trajnimeve dhe konsultimeve në fushën e zbatimit të standardeve ESG. Stafi i AKA-së do të vizitojë Agjencinë Austriake të Akreditimit dhe partnerët austriakë do të vizitojnë gjithashtu Kosovën, ku do të shkëmbejnë përvojat dhe praktikat më të mira të menaxhimit të institucioneve, menaxhimit të procesit, sigurimit të cilësisë dhe mbikëqyrjes së rezultateve. Shkëmbimet do të bëhen në të gjitha nivelet që lidhen me cilësinë në arsimin e lartë.

Projekti do të fokusohet në këto fusha më specifike në hartimin e metodologjive për procesin e akreditimit dhe zbatimit (vendimmarrjes) raportimit dhe procesit të ankimimit në përputhje me Standardet dhe Udhëzimet Evropiane (ESG).

Pjesë e projektit është edhe përkrahja e AQ Austria për AKA-në në përgatitjen për rikthim në ENQA dhe EQAR.

1.5 Është finalizuar studimi i fizibilitetit për digjitalizimin dhe automatizimin e proceseve në AKA

Me mbështetjen e Ambasadës së Shteteve të Bashkuara të Amerikës në Prishtinë – Projekti Fulbright, Agjencia e Kosovës për Akreditim (AKA), më 25 nëntor 2021, ka finalizuar projektin e zbatimit të studimit të fizibilitetit për digjitalizimin e përgjithshëm të proceseve.

Ky projekt do të kontribuojë në digjitalizimin dhe automatizimin e të gjitha proceseve në AKA dhe do të mundësojë rritjen e transparencës për publikun.

AKA tani ka projektin implementues për digjitalizimin dhe automatizimin, i cili gjatë vitit 2022 planifikohet të zbatohet dhe do të vihet në funksion për të gjithë aktet e arsimit të lartë në Republikën e Kosovës.

Zbatimi i këtij projekti do të bëhet me fondet e AKA-së dhe donatorëve ndërkombëtarë, për të rritur kënaqësinë e të gjitha palëve të interesuara, përfshirë studentët, komunitetin akademik, organizatat e shoqërisë civile dhe publikun e gjerë.

Ideja është që të integrohen të gjitha këto pjesë në një platformë të vetme ku procesi i akreditimit do të digjitalizohet plotësisht. Portugalia është një nga vendet e BE-së që ka pasur shumë sukses në digjitalizimin e akreditimit. AKA po planifikon ta sjellë këtë model në Kosovë.

AKA ka planifikuar buxhetin prej 50 mijë euro për vitin 2022, ndërsa ka marrë premtime nga donatorët që do të na ndihmojnë në finalizimin e digjitalizimit.

Në këtë projekt kanë qenë të përfshirë të gjithë aktet e arsimit të lartë. Rekomandimet e tyre janë analizuar dhe disa nga ato janë përfshirë në dokumentin final.

[Shkarko dokumentin në ueb faqen e AKA-së](#)

1.6 Është aprovuar metodologjia për analiza tematike

Me financimin e Ambasadës së Shteteve të Bashkuara të Amerikës, Organizata WUS Kosova ka zbatuar projektin “Përkrahja e Agjencisë së Kosovës për Akreditim për plotësimin e disa rekomandimeve të ENQA”.

Projekti është zbatuar në periudhën shtator 2020 – shtator 2021.

Pika kryesore e këtij projekti ka qenë zbatimi i rekomandimit të ENQA për krijimin e Metodologjisë për analiza tematike. AKA ka përveç krijimit të Metodologjisë së analizës tematike, ka zbatuar edhe dy analiza tematike:

- a) Përgatitja e të diplomuarve kosovarë për tregun e punës – Perspektiva e punëdhënësit dhe e të diplomuarve;

b) Analiza Tematike për Akreditimin Institucional për IAL.

Pjesë e këtij projekti ka qenë edhe trajnimi i stafit të AKA-së për të zbatuar në të ardhmen analiza tematike të temave me interes të sistemit të arsimit të lartë.

Në këtë projekt kanë qenë të përfshirë të gjithë akterët e arsimit të lartë në Kosovë dhe komuniteti i biznesit.

[Shkarko Metodologjinë e analizës tematike në ueb faqen e AKA-së](#)

[Shkarko analizën tematike 1 në ueb faqen e AKA-së](#)

[Shkarko analizën tematike 2 në ueb faqen e AKA-së](#)

1.7 Është aprovuar Udhëzuesi për Vlerësim të Brendshëm të stafit të AKA

Me përkrahjen e projektit të WUS Kosova, AKA ka aprovuar Udhëzuesin për Vlerësimin e Brendshëm të personelit të AKA-së, i cili ka qenë edhe rekomandim i ENQA.

Qëllimi i këtij udhëzuesi është menaxhimi i performancës si një proces i vazhdueshëm organizativ që realizohet për të maksimizuar produktivitetin e stafit me qëllim të përgjithshëm të përmirësimit të efektivitetit të institucionit. Ky udhëzues përputhet me qëllimet strategjike të AKA-së dhe kërkon komunikim të hapur ndërmjet menaxherëve dhe stafit.

[Shkarko dokumentin në ueb faqen e AKA-së](#)

1.8 Është finalizuar Metodologjia e Monitorimit dhe procedurave pasakredituese

AKA ka finalizuar dokumentin Metodologjia e Monitorimit dhe procedurave pasakredituese. Deri më tani AKA nuk ka pas një mekanizëm të monitorimit dhe as të procedurave pas akredituese dhe kjo ka qenë ngecje e madhe për sigurimin e cilësisë në arsimin e lartë.

Dokumenti do të shërbejë si udhërrëfyes për AKA-në, institucionet e arsimit të lartë, ekspertët ndërkombëtarë si dhe publikun e gjerë për zbatimin e procedurave të drejta dhe transparente pas akredituese dhe të monitorimit.

Dokumenti përmbush Standardin 2.3 të Udhëzuesve Evropian të Sigurimit të Cilësisë në Arsimin e Lartë (ESG) i cili kërkon që agjencitë e sigurimit të cilësisë të përmbyllin ciklin e akreditimit me procedura pas akredituese të cilat kanë për qëllim përmirësimin e vazhdueshëm të cilësisë së institucioneve të arsimit të lartë.

Për hartimin e këtij projekti kanë qenë të përfshirë të gjithë akterët e arsimit të lartë, nëpërmes konferencave, intervistave, tryezave dhe dëgjimit publik.

Ky dokument është realizuar me përkrahjen e Projektit QAIN, i financuar nga ADA Austriake. Dokumenti është pikë e rendit të ditës për aprovim në mbledhjen e KShC-së në shkurt 2022.

[Shkarko dokumentin në ueb faqen e AKA-së](#)

1.9 Vërtetimet për akreditim tani lëshohen online

Me financimin e Ambasadës së SHBA-së, AKA në verën e vitit 2021 ka digjitalizuar lëshimin e konfirmimeve për akreditim. Të gjithë studentët dhe të diplomuarit që kanë nevojë të pajisen me vërtetime për akreditimin e programeve të tyre të studimeve, tani mund t'i nxjerrin ato online, pa pasur nevojë që të vijnë fizikisht në Agjencinë e Akreditimit.

Kjo është një arritje e madhe, sepse përveç rritjes së sigurisë së lëshimit të dokumentacionit, dhe eliminimit të gjitha mundësive për gabime njerëzore, kjo platformë rrit edhe besueshmërinë e dokumenteve të lëshuara nga Agjencia e Akreditimit tek partnerët ndërkombëtarë.

Çdo vërtetim i nxjerrë në mënyrë elektronike, të gjitha palëve ju mundëson verifikimin elektronik në linkun e veçantë. Të gjitha agjencitë homologe të AKA-së në Evropë dhe më gjerë, tani kanë qasje direkte në verifikimin e dokumenteve të lëshuara nga AKA.

Ky shërbim ka kaluar të gjitha standardet e sigurisë kibernetike nga Agjencia e Shoqërisë së Informacionit (ASHI).

[Shih aplikacionin në ueb faqen e AKA-së](#)

1.10 Është aprovuar Manuali për ekspertë ndërkombëtarë të akreditimit

Agjencia e Akreditimit e Kosovës (AKA) me përkrahjen e Projektit Heras Plus ka aprovuar një Manual Informimi dhe Trajnimi për të siguruar udhëzime të bazuara në praktikë për ekspertët ndërkombëtarë të vlerësimit të cilët kryejnë një vlerësim të jashtëm të institucioneve të arsimit të lartë (IAL) në Kosovë në emër të Agjencisë së Akreditimit të Kosovës (AKA).

Manuali është jetik pasi Agjencia do ta përdorë atë për t'u ofruar ekspertëve trajnim zyrtar në temat përkatëse të procesit të akreditimit dhe kuptimin kontekstual të peizazhit të arsimit të lartë dhe proceseve të lidhura me to.

Projekti ndikon drejtpërdrejt në cilësinë e shërbimeve të Agjencisë së Akreditimit për vlerësimin e jashtëm të institucioneve të arsimit të lartë, por gjithashtu plotëson një nga kriteret për kthimin tonë në ENQA dhe EQAR.

“Me këtë produkt, Projekti Heras Plus dhe donatorët austriakë po kontribuojnë në sigurimin e cilësisë në arsimin e lartë në Kosovë. “Udhëzimet për ekspertët e jashtëm që marrin pjesë në procesin e vlerësimit në Kosovë, rrit cilësinë e shërbimeve tona, u shpjegon në detaje ekspertëve standardet e AKA-së dhe kontekstin kosovar”, tha Gashi.

[Shkarko Manualin në ueb faqen e AKA-së](#)

1.11 Është lansuar ueb faqja e re e AKA-së dhe profili zyrtar në Facebook

Me financimin nga Ambasada e Shteteve të Bashkuara të Amerikës është zhvilluar dhe lansuar ueb faqja e re e AKA-së.

Faqja është në tri gjuhë, shqip, anglisht dhe serbisht. Në ueb faqe publikohen të gjitha vendimet dhe zhvillimet në AKA.

AKA ka lansuar edhe profilin zyrtar në Facebook, ku publikohen të gjitha lajmet, njoftimet dhe zhvillimet në AKA.

[Shiko ueb faqen e re në ueb faqen e AKA-së](#)

[Shiko profilin zyrtar në Facebook në ueb faqen e AKA-së](#)

1.12. ASHI garanton sigurinë kibernetike të AKA-së

Krahas krijimit të ueb faqes së re, është bërë edhe transferi i serverëve të AKA-së tek Agjencia Shtetërore e Informacionit (ASHI). Tani e tutje ueb faqja e Agjencisë, lëshimi i vërtetimeve elektronike për akreditim dhe platforma E-Akreditimi ku ruan të dhënat e mbi 4000 personave staf akademik, garantohej nga ASHI.

1.13 Ndërlidhja e Platformës E-Akreditimi me Administratën Tatimore

AKA ka në pronësi platformën elektronike E-Akreditimi e cila ruan të gjitha të dhënat e stafit akademik në Republikën e Kosovës. Gjatë vitit 2021 AKA ka lidhur këtë platformë me serverët e Administratës Tatimore të Kosovës, për të verifikuar nëse stafi akademik ka më shumë se një vend pune me orar të plotë.

Kjo platformë ka eliminuar dukurinë e anagzhimit të stafit akademik në më shumë se dy vende me orar të plotë të punës.

[Shiko platformën elektronike në ueb faqen e AKA-së](#)

1.14 Publikohen të gjitha vendimet dhe raportet e ekspertëve ndërkombëtarë të akreditimit

Me qëllim të transparencës së plotë dhe llogaridhënies ndaj publikut, Agjencia e Kosovës për Akreditim (AKA) ka publikuar më 13.08.2021 të gjitha vendimet dhe raportet përfundimtare të ekspertëve ndërkombëtarë të akreditimit.

Transparenca dhe llogaridhënia e plotë, janë një nga rekomandimet e ENQA, të cilin AKA po e zbaton në plotni.

Procesi i akreditimit për programet e vitit akademik 2021/2022, ka filluar në janar të këtij viti dhe ka përfunduar me sukses më 27 korrik 2021, kur Këshilli Shtetëror i Cilësisë, vendosi për raportet e ekspertëve ndërkombëtarë të akreditimit.

Pas disa vitesh, për herë të parë janë vlerësuar të gjitha programet studimore që kanë qenë në proces të akreditimit ose riakreditimit, ndërsa janë përcaktuar edhe kuotat për numrin e studentëve që do të regjistrohen në një program studimi, sipas rekomandimeve të ekspertëve ndërkombëtarë.

[Shiko vendimet në ueb faqen e AKA-së](#)

1.15 AKA publikon listat me programet e akredituara dhe spotin informues

Agjencia e Kosovës për Akreditim ka publikuar më 06.08.2021 listën me programet e akredituara në institucionet e arsimit të lartë në Republikën e Kosovës për vitin e ri akademik 2021/2022.

Në listën e vendimeve me programet e akredituara përfshihen vendimet e Këshillit Shtetëror të Cilësisë (KShC) të datës 27.07.2021, por edhe programet që kanë pasur akreditim të mëhershëm.

Të gjithë studentët e rinj janë njoftuar, se asnjë program akademik i cili nuk ndodhet në këtë listë, nuk është valid në Republikën e Kosovës.

Gjithashtu me buxhetin e vet AKA ka publikuar edhe një spot publicitar i cili i këshillon studentët e rinj që para se të vendosin për aplikim në ndonjërin nga IAL-të, të vizitojnë faqen e AKA-së.

[Shiko programet e akredituara në ueb faqen e AKA-së](#)

[Shiko spotin në ueb faqen e AKA-së](#)

2. PLOTËSIMI I REKOMANDIMEVE PËR ENQA DHE EQAR

2.1 Miratimi i Ligjit për AKA-në në Qeveri

Me propozimin e Ministres së Arsimit, Shkencës, Teknologjisë dhe Inovacionit, Arbërie Nagavci, Qeveria e Republikës së Kosovës, në mbledhjen e mbajtur më 10.12.2021, miratoi Projektligjin për Agjencinë e Kosovës për Akreditim.

Ky Projektligj rregullon statusin e Agjencisë së Kosovës për Akreditim si agjenci rregullatore në proceset dhe përgjegjësitë e akreditimit, riakreditimit, validimit dhe monitorimit, me qëllim të sigurimit të cilësisë në arsimin e lartë në Republikën e Kosovës. Në hartimin e këtij projektligji janë përfshirë të gjithë aktetë relevantë, ekspertë nga MASHTI, Agjencia e Akreditimit, përfaqësues të komunitetit akademik, donatorëve dhe të shoqërisë civile.

Ky version i Projektligjit siguron pavarësinë e Agjencisë së Akreditimit si dhe zbatimin e standardeve evropiane të sigurimit të cilësisë në arsimin e lartë.

Me miratimin e këtij ligji po plotësohet edhe kriteri i fundit për riaplikim të AKA-së për rikthim në ENQA dhe EQAR.

2.2 Plani Dinamik për kthim në ENQA dhe EQAR

AKA ka përpiluar dhe dorëzuar në MASHTI Planin Dinamik për Kthimin në ENQA dhe EQAR.

Sipas këtij Plani nga 13 rekomandimet kryesore për kthim në ENQA dhe EQAR tashmë janë plotësuar në masën mbi 90%. Pasi që të aprovet Ligji për AKA-në në Kuvend dhe të nxirren aktet nënligjore, llogaritet se plotësohen kriteret në nivelin 100%.

2.3 Vizitat e KShC dhe AKA në të gjitha institucionet e arsimit të lartë

Kryetarja e Këshilli Shtetëror i Cilësisë (KShC), anëtarë të Këshillit dhe drejtuesit e AKA-së, kanë vizituar të gjitha institucionet e akredituara të arsimit të lartë në Kosovë. Gjatë vizitave, përveç menaxhmentit janë zhvilluar takime edhe me përfaqësuesit e studentëve dhe komunitetin akademik.

Nga drejtuesit e institucioneve të arsimit të lartë, komuniteti akademik dhe studentët janë marrë rekomandime konkrete për ngritjen e cilësisë në arsimin e lartë.

Përfshirja e IAL-ve në procesin e vendimmarrjes është edhe një nga kriteret për kthim në ENQA dhe EQAR.

[Shiko lajmet nga vizitat në terren në ueb faqen e AKA-së](#)

2.4 Ndërtesa e re e AKA-së

Ministria e Arsimit, Shkencës, Teknologjisë dhe Inovacionit (MASHTI) ka vendosur që objekti i ri publik, në lokacionin “Prishtina e Re”, t’i dedikohet AKA-së. Objekti është modern me mbi 1000 metra katrorë, dhe i plotëson të gjitha nevojat e AKA-së.

Ndërtimi i selisë së re është planifikuar të përfundojë në fillim të vitit 2022 dhe pritet që AKA të kalojë në objektin e ri deri në fund të vitit 2022.

Me këtë ndërtesë AKA plotëson kriterin e ENQA për “hapësira të mjaftueshme për stafin e Agjencisë”.

2.5 Rekrutimi i stafit

Me rastin e ndryshimit të Ligjit për Zyrtarët Publikë kanë ndryshuar edhe procedurat e rekrutimit të personelit. Duke qenë se stafi i AKA-së janë nëpunës civilë, është pritur derisa janë krijuar procedurat e reja të rekrutimit në përputhje me ligjin e ri.

AKA aktualisht ka 9 staf, ndërsa ka 32 staf të aprovuar. Pritet që gjatë vitit 2022 numri i të punësuarve në AKA të dyfishohet – 18.

2.6 Bashkëpunimi me shoqërinë civile

AKA ka të nënshkruar Memorandum Bashkëpunimi me projektin QAIN, i cili i mundëson organizatës vendore ORCA që të bëjë monitorimin e punës së Agjencisë dhe KShC-së.

Monitorimin e punës së KShC-së e bën edhe organizata BIRN.

Në të gjitha raportet e këtyre dy organizatave figuron se AKA është shumë transparente dhe llogaridhënëse para publikut.

[Shiko raportin e ORCA për AKA-në në ueb faqe](#)

2.7 Avokatura Shtetërore: AKA nuk rrezikohet nga asnjë kontest gjyqësor

Avokatura Shtetërore e Kosovës më 11.11.2021 ka konstatuar se AKA po respekton plotësisht kornizën ligjore në Republikën e Kosovës dhe nuk rrezikohet nga asnjë kontest gjyqësor.

Avokatura Shtetërore është zotuar se do të përkrahë plotësisht Agjencinë e Akreditimit, jo vetëm për mbrojtjen juridike nëpër gjykata, por edhe për përpilimin e akteve juridike, në mënyrë që ato të jenë plotësisht në harmoni me legjislacionin në fuqi dhe të mos mund të kontestohen nëpër gjykata.

Avokatura i ka mirëpritur masat e ndërmarra nga AKA për të garantuar siguri juridike ndaj të gjitha palëve. Me përkrahjen e deritanishme e Avokaturës Shtetërore Agjencia e Akreditimit të mos humb asnjë rast nëpër gjykata.

Avokatura Shtetërore dhe Agjencia e Akreditimit kanë caktuar personat kontaktues në mënyrë që të lehtësohet bashkëpunimi ndërmjet dy institucioneve. Avokatura ka shprehur gatishmëri për të përkrahur AKA-në në rastet e përgatitjes së padive nëpër gjykata kur evidentohen shkeljet në sistemin e arsimit të lartë.

3. BASHKËPUNIMI ME INSTITUCIONE E PARTNERË NDËRKOMBËTARË

3.1 Raporti i Komisionit Evropian për Kosovën, shumë pozitiv për punën e AKA-së

Raporti i Komisionit Evropian për Kosovën, i tetorit të viti 2021 në pjesën për Agjencinë e Kosovës për Akreditim (AKA) është i saktë, shumë pozitiv dhe inkurajues për punën e AKA-së dhe jep shpresë për kthimin në ENQA dhe EQAR.

Megjithëse i prekur nga pandemia, Komisioni Evropian vlerësoi se, citat: *“Agjencia arriti të përfundojë ciklin e plotë të akreditimit për vitin akademik 2021-2022, duke ulur numrin e programeve dhe institucioneve, bazuar në kriteret e cilësisë”*.

Kjo tregon se AKA i zbaton plotësisht standardet evropiane të cilësisë, pasi në procesin e akreditimit gjatë këtij viti janë angazhuar 81 ekspertë eminentë ndërkombëtarë.

Edhe në raportin e 23 shkurt 2021 në kuadër të Procesit të Marrëveshjes së Stabilizim Asociimit, Komisioni Evropian e vlerëson shumë pozitivisht punën e AKA-së, duke thënë se *“megjithëse në kushte pandemie procesi i akreditimit është menaxhuar shumë mirë”*.

Komisioni Evropian e vlerëson punën e AKA-së për përmbushjen e kriterëve për kthimin në ENQA dhe EQAR kur thotë *“AKA vazhdoi përpjekjet për të rikthyer anëtarësimin”*.

Komisioni Evropian ka vërtetuar edhe raportet e organizatave të shoqërisë civile në Kosovë, të cilat e kanë vlerësuar shumë pozitivisht punën e Agjencisë së Akreditimit.

[Shiko raportin në ueb faqen e Komisionit Evropian](#)

3.2 Rishikimi i standardeve në nivelin bachelor dhe master

Me financimin nga ADA Austriake, Projekti Heras Plus po zbaton projektin e rishikimit të standardeve në nivelin bachelor dhe master.

Në këtë projekt janë të përfshira MASHTI, KShC, AKA, IAL-të, ekspertë vendorë dhe ndërkombëtarë, përfaqësues të donatorëve, shoqërisë civile, komuniteti akademik, studentët etj.

Janë mbajtur tryeza dhe konferenca me të gjithë akterët e arsimit të lartë. Tani ekziston një draft i rishikuar i standardeve i cili kalon nëpër procedura të rishikimit publik. Deri në prill të vitit 2022 pritet që të hyjnë në fuqi standardet e reja, ndërsa për 6 muaj do të mbahen trajnime me IAL-të për tu përgatitur për aplikimin e tyre në tetor të vitit 2022.

3.3 AKA fiton grant nga Ambasada Amerikane për përfshirjen e studentëve në vendimmarrje

Agjencia e Akreditimit, më 8 tetor 2021, është shpallur fituese e grantit nga Ambasada Amerikane në Kosovë. Projekti i financuar synon të rrisë përfshirjen e studentëve në procesin e sigurimit të cilësisë, duke krijuar një ndikim të drejtpërdrejtë në sistemin e arsimit të lartë në Kosovë dhe duke i kthyer studentët në palë të rëndësishme të interesit brenda sistemit.

3.4 CEENQA prezanton suksesin e AKA-së në procesin e digjitalizimit të shërbimeve

Në numrin e dhjetorit të revistës së Rrjetit të Agjencive të Sigurimit të Cilësisë në Arsimin e Lartë të Evropës Qendrore dhe Lindore (CEENQA), është prezantuar puna e suksesshme e Agjencisë së Kosovës për Akreditim (AKA) në finalizimin e projektit zbatues për digjitalizimin e përgjithshëm të proceseve në AKA.

Krahas agjencive simotra të vendeve të Evropës Qendrore dhe Lindore, në faqen 13 të kësaj reviste, AKA-Kosova prezantohet me titullin “*Është finalizuar studimi i fizibilitetit për digjitalizimin dhe automatizimin e proceseve në AKA*”. Kjo është hera e tretë brenda një viti që CEENQA prezanton Kosovën dhe Agjencinë e saj për Akreditim si storie të suksesit për ngritjen e cilësisë në arsimin e lartë.

Në dhjetorin e vitit 2020 dhe në korrikun e vitit 2021, CEENQA e ka prezantuar AKA gjithashtu me vlerësime shumë pozitive.

Kosova është anëtare me të drejta të plota në CEENQA.

[Shiko njoftimin në ueb e CEENQA](#)

3.5 AKA dhe Asociacioni amerikan ATMAE bashkëpunojnë për nxitjen e cilësisë në arsimin e lartë

Me ftesë të agjencisë homologe amerikane – Asociacionit për Teknologji, Menaxhment dhe Inxhinieri Aplikative (ATMAE), e cila bën akreditimin e të gjitha programeve akademike në fushën e teknologjisë dhe inxhinierisë në ShBA, delegacioni i Agjencisë së Kosovës për Akreditim (AKA) dhe MASHTI-it (Qendra NARIC), në nëntor 2021 qëndruan për një javë në Orlando të Floridas në SHBA.

Gjatë takimeve me homologët amerikanë, ATMAE ka shprehur gatishmërinë për të përkrahur AKA-në me ekspertë eminentë për të nxitur zhvillimin e programeve akademike në fushën e teknologjisë dhe inxhinierisë në Kosovë.

Drejtuesit e ATMAE kanë shprehur gatishmërinë që stafi i AKA-së të përfshihet, në cilësinë e ekspertëve të jashtëm, në procesin e akreditimit të programeve akademike në ShBA. Kjo është një dëshmi e fortë se homologët amerikanë besojnë në vlerat, integritetin akademik dhe institucional që përfaqëson AKA-ja.

Delegacioni i Kosovës mori pjesë në mbledhjet e Bordit dhe manaxhmentit të ATMAE, në disa konferenca shkencore dhe inovative, në panairin e universiteteve më të njohura amerikane dhe në garën e studentëve në fushën e robotikës.

Në ceremoninë kryesore ATMAE i ka ndarë delegacionit nga Kosova një mirënjohje “për bashkëpunim dhe akreditim të suksesshëm”.